

SAKSPAPIR

Saksnr	Utval	Type	Dato
018/18	Plan- og miljøutvalet	PS	24.01.2018

Saksbehandlar	ArkivsakID
Siril Therese Sylta	18/124

Høyring - framlegg til forskrift om vern av Lurefjorden og Lindåsosane marine verneområde

Vedlegg :

Marint vern i Hordaland - høyring av verneframlegg for tre kandidat område Lurefjorden med Lindåsosane, Krossfjorden og Ytre Hardangerfjord Forskrift om vern av Lurefjorden og Lindåsosane marine verneområde_091116 Kart Lurefjorden Sammenfatning av innspel til oppstartsmelding FMHO_Faktaark for Lurefjorden og Lindåsosane_revidert etter faglig gjennomgang Fakta Lurefjorden Marint vern i Hordaland - høyring av verneframlegg for tre kandidat område Lurefjorden med Lindåsosane, Krossfjorden og Ytre Hardangerfjord Fylkesmannens tilråding

Rådmannen sitt framlegg til uttale

I framlegg til forskrift § 4, bokstav j må endrast slik at den klart gjeld tiltak som ligg innanfor verneforskrifta sitt virkeområde.

Det vert lagt inn eit unntak for oppgardering av avløpsanlegg med heimel i forureiningsforskrifta § 12 i § 4.

I forskrifta § 5 bokstav d, er det opna for spesifiserte dispensasjonsreglar for tilretteleggingstiltak for friluftsliv. Forskrifta bør ha døme på kva tiltak som fell innanfor ordlyden her, slik at det vert etablert ein felles forståing av kva som ligg i ordlyden.

.....

Plan- og miljøutvalet - 018/18

PM - behandling:

Framlegg frå Hogne Brunborg-Ap:

Lindås kommune er godt kjent med forvaltingsarbeidet og føremålet med å få på plass ein marin verneplane for kandidat område Lurefjorden med Lindåsosane. Kommunen er positiv til at det marine naturmiljøet her vert teke vare på med sitt unike økosystem.

Lindås kommune har tidlegare slutta seg til "Areal og forvaltingsplan for Den indre Farleia", den tek opp i seg mykje av det som er med i denne verneplanen. Lindås kommune er godt kjent med at marint vern i dette området er eit ledd i arbeidet med å verne eit representativt utval av norsk natur for komande generasjonar.

Framlegget vart vedteke med 7 røyster (Krf, Ap, Sp, A. Høgquist-Frp)

Framlegg frå Hogne Brunborg-Ap:

Lindås kommune ynskjer at forvaltningsstyresmakta vert lagt til kommunalt nivå.

Framlegget vart samrøystes vedteke

Rådmannen sitt framlegg med endringar:

I framlegg til forskrift § 4, bokstav j må endrast slik at den klart gjeld tiltak som ligg innanfor verneforskrifta sitt virkeområde.

I forskrifta § 5 bokstav d, er det opna for spesifiserte dispensasjonsreglar for tilretteleggingstiltak for friluftsliv. Forskrifta bør ha døme på kva tiltak som fell innanfor ordlyden her, slik at det vert etablert ein felles forståing av kva som ligg i ordlyden.

For separate utslepp etter forurensingslova kapittel 12 må det leggjast inn som eige punkt i framlegg til forskrift § 4, generelle unntak frå vernereglane. Dersom det ikkje vert lagt inn som unntak så må det leggjast inn som eit eige punkt i § 5, spesifiserte dispensasjonsreglar. Framlegget vart samrøystes vedteke

PM - vedtak:

Uttale i Plan og miljøutvalet - 24.01.2018:

I framlegg til forskrift § 4, bokstav j må endrast slik at den klart gjeld tiltak som ligg innanfor verneforskrifta sitt virkeområde.

I forskrifta § 5 bokstav d, er det opna for spesifiserte dispensasjonsreglar for tilretteleggingstiltak for friluftsliv. Forskrifta bør ha døme på kva tiltak som fell innanfor ordlyden her, slik at det vert etablert ein felles forståing av kva som ligg i ordlyden.

For separate utslepp etter forurensingslova kapittel 12 må det leggjast inn som eige punkt i framlegg til forskrift § 4, generelle unntak frå vernereglane. Dersom det ikkje vert lagt inn som unntak så må det leggjast inn som eit eige punkt i § 5, spesifiserte dispensasjonsreglar.

Lindås kommune er godt kjent med forvaltingsarbeidet og føremålet med å få på plass ein marin verneplane for kandidat område Lurefjorden med Lindåsosane. Kommunen er positiv til at det marine naturmiljøet her vert teke vare på med sitt unike økosystem.

Lindås kommune har tidlegare slutta seg til "Areal og forvaltingsplan for Den indre Farleia", den tek opp i seg mykje av det som er med i denne verneplanen. Lindås kommune er godt kjent med at marint vern i dette området er eit ledd i arbeidet med å verne eit representativt utval av norsk natur for komande generasjonar.

Lindås kommune ynskjer at forvaltningsstyresmakta vert lagt til kommunalt nivå.

Saksopplysningar:
Politisk handsaming

Saka skal leggest fram for Plan- og miljøutvalet for uttale til framlegg til verneforskrift for Lurefjorden og Lindåsosane marine verneområde.

Saka gjeld

Lindås kommune har motteke høyring av verneframlegg for 3 kandidatområde for marint vern i Hordaland. Dette er Lurefjorden med Lindåsosane, Krossfjorden og Ytre Hardangerfjord den 22.02.2017. Lindås kommune gav ikkje svar på høyringa.


Lurefjorden med Lindåsosane marine verneområde gjeld område kommunane Lindås, Radøy og Austrheim. Verneområdet gjeld sjøareal på om lag 71 km².

Fylkesmannen i Hordaland har utarbeidd eit framlegg til verneområde med verneplan og forskrift for det einskilde verneområdet, som er sendt over til Miljødirektoratet for handsaming.

Lindås kommune hadde eit møte med Fylkesmannen i Hordaland vedkomande verneframlegget som gjeld for delar av kommunen. På bakgrunn av det, er det opna for at Lindås kommune kan kome med uttale i saka før Miljødirektoratet tek saka til handsaming, og sender si tilråding til Klima- og miljødepartementet.

Høyringsdokumenta er framlegg til forskrift, kart som viser geografisk avgrensing av verneområdet, faktaark om Lurefjorden og Lindåsosane. Dokumenta er lagt ved saksframlegget.

Kart



Verneverdiar

Lurefjorden med Lindåsosane er ein terskelfjord som lenge har stått i fokus som forskingsområde for norske og utanlandske marinbiologar. Det er eitt av dei mest særprega fjordsystema i verda, der all vassutskifting skjer ved tidevasstraumar i 4 tronge sund. Dette gjer Lurefjorden til ein dårleg resipient, og dermed uinteressant for matfiskproduksjon med dagens teknikk. Store djup og mørkt vatn er med på å skape særpreget. Vanskelege lystilhøve i sjøen gjer at fjorden ikkje er rik på fisk i dag, men sterkt dominert av kronemaneten *Periphylla periphylla*. Lindåsosane har ei spesiell og vel dokumentert sildestamme. Kommunane i dette området arbeider med planar om å gjere regionen til eit UNESCO biosfæreservat. Biosfæreservat skal byggjast rundt større eksisterande verneområde, og eit marint vern av dette kandidatområdet kan bli viktig for at regionen skal oppnå slik status.

For meir informasjon om verneverdiane, vert det vist til vedlagte faktaark.

Rettsleg grunnlag og verknad av Lindåsosane og Lurefjorden som verneområde

Heimelsgrunnlaget for verneområdet er naturmangfoldslova § 39.

Fylkesmannen i Hordaland meiner at områda bør vernast som marine verneområde med heimel i naturmangfaldlova § 39. Eit marint verneområde må tilfredsstille minst eitt av følgjande kriterium etter § 39:

- (a) Området inneheld særeigne eller representative økosystem som er utan tyngre naturinngrep
- (b) Området inneheld trua, sjeldan eller sårbar natur
- (c) Området representerer ein bestemt type natur
- (d) Området har på annan måte særleg betydning for biologisk mangfald

- (e) Området utgjør ein spesiell geologisk førekomst
- (f) Området har særskilt naturvitskapleg verdi
- (g) Området har særskilt betydning som økologisk funksjonsområde for ein eller fleire bestemte artar.

Lurefjordane med Lindåsosane tilfredsstiller kriteria a, b, c, d og f.

Verneframlegga gjeld ikkje for privat eigedom. I framlegg til verneforskrift står det i § 2 at *«det marine verneområdet dekker et sjøareal på om lag 70 km² med grense mot land langs dybdekote 2 m under sjøkartnull. Verneområdet femner om overflata, vassøyla og sjøbotnen.»*

Vurdering

Marint vern av Lindåsosane og Lurefjorden er heimla i naturmangfoldlova. Lindås kommune ønskjer at det vert presisert verknaden og fordelar av at området vert lagt inn som eit marint vern, vurdert opp mot dei generelle vurderingane som naturmangfoldlova elles set krav om ved utøving av offentleg mynde, jf. §§ 7 til 12.

I framlegg til forskrift går det fram at denne ikkje gjeld for private eigedommar på land, men gjeld overflata, vassøyla og sjøbotnen med grense mot land på kote 2 under sjøkartnull. I framlegg til forskrift § 4 er det vist til generelle unntak frå vernereglane, der det mellom anna i bokstav j er vist til *«drift og vedlikehald av andre eksisterande anlegg og innretningar, medrekna avløpsanlegg, vegar, bruer, brygger, moloar, båtstøer og båthus.»*

Då forskrifta skal ha sitt virkeområde skal gjelde for tiltak som ligg på kote 2 under sjøkartnull, er det unaturleg at forskrifta viser til unntak i § 4 som vegar, båthus (naust), avløpsanlegg. Dette er tiltak som er plassert på land, der verneforskrifta ikkje skal gjelde.

Det er viktig at ordlyd og innhald i forskrifta er så presis og klart formulert, slik at dei som les og skal bruke forskrifta forstår avgrensing og omfang av vernereglane og unntak frå desse.

Informasjon om marint vern ligg og på heimesida til Fylkesmannen i Hordaland [her](#).

.....